

**ՀՀ ԿՐԹՈՒԹՅԱՆ, ԳԻՏՈՒԹՅԱՆ, ՄՇԱԿՈՒՅԹԻ ԵՎ ՍՊՈՐՏԻ  
ՆԱԽԱՐԱՐՈՒԹՅՈՒՆ**

**ԳՈՐԻՍԻ ՊԵՏԱԿԱՆ ՀԱՄԱԼՍԱՐԱՆ**



**ՀԵՐԹԱԿԱՆ ԱՏԵՍԱԿՈՐՄԱՆ ԵՆԹԱԿԱ  
ՈՒՍՈՒՑԻՉՆԵՐԻ ՎԵՐԱՊԱՏՐԱՍՏՄԱՆ ԴԱՍԸՆԹԱՑ  
ՀԵՏԱՉՈՏԱԿԱՆ ԱՇԽԱՏԱՆՔ**

**ԹԵՄԱ՝** Ավետիք Իսահակյանի «Մի մրահոն աղջիկ տեսա»  
բանաստեղծության ուսուցումը 8-րդ դասարանում

**ԱՌԱՐԿԱ՝** Գրականություն

**ՀԵՂԻՆԱԿ՝** Վարդուհի Կլազանց

**ՈՒՍՈՒՄՆԱԿԱՆ ՀԱՍՏԱՏՈՒԹՅՈՒՆ՝** Ն. Խնձորեսկի միջնակարգ դպրոց

*Աշխատանքը թույլատրված է պաշտպանության*

**ԱՇԽԱՏԱՆՔԻ ԳԻՏ. ՂԵԿԱՎԱՐ՝** Սոնա Կամոյի Ալավերդյան

# ԲՈՎԱՆԴԱԿՈՒԹՅՈՒՆ

ՆԵՐԱԾՈՒԹՅՈՒՆ .....	3
1. Ընդհանուր տեղեկություններ՝ բանաստեղծության մասին .....	5
2. «Մի մրահոն աղջիկ տեսա» բանաստեղծության ուսուցման քայլաշար .....	6
ԵԶՐԱԿԱՑՈՒԹՅՈՒՆՆԵՐ .....	11
ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ .....	12

## ՆԵՐԱԾՈՒԹՅՈՒՆ

Ավետիք Իսահակյանի «Մի մրահոն աղջիկ տեսա» բանաստեղծությունը Ռիալտոյի կամրջի վրա հասուն տղամարդու և առեղծվածային աղջկա պատահական հանդիպման պատկերի նկարագրությունն է: Այս քնարական ստեղծագործությունը կենտրոնանում է սիրո, գեղեցկության և ժամանակի ընթացքի թեմաների մեջ: Բանաստեղծությունը նաև պատուհան է բացում դեպի Իսահակյանի անձնական փորձառությունները, հատկապես երիտասարդության տարիներին նրա անպատասխան սերը: Սույն հետազոտությունը բացահայտում է 8-րդ դասարանի աշակերտների շրջանում նշյալ բանաստեղծության ուսուցման հնարավոր օգուտներն ու մարտահրավերները՝ հաշվի առնելով դրա գրական և զգացմունքային հարուստ բովանդակությունը:

Իսահակյանի բանաստեղծությունը սովորողներին ծանոթացնելը կարող է կրթական արժեքավոր փորձ լինել, քանի որ այն հնարավորություն կտա նրանց զբաղվելու հայ գրականության նշանավոր գործով և պատկերացում կազմելու մարդկային հույզերի բարդության մասին: Ավելին՝ բանաստեղծության պատկերավոր խոսքն ու ներհայեցման դրդող ոճը կառաջնդեն լեզվի, խորհրդանիշների և ստեղծագործական գործընթացի շուրջ քննարկումների: Այս հանգամանքներով էլ պայմանավորված է **թեմային արդիականությունը**:

Հետազոտության **նպատակն է** ներկայացնել Ավետիք Իսահակյանի «Մի մրահոն աղջիկ տեսա» բանաստեղծության՝ 8-րդ դասարանում ուսուցանման արդյունավետ եղանակը՝ առաջարկելու քայլաշար՝ հայ գրականության նմանատիպ ստեղծագործությունների ավելի խոր ընկալման և թեմաների ու գրական հնարների ուսումնասիրման միջոցով ուսանողների քննադատական մտածողության հմտությունների զարգացման համար:

Հետազոտության խնդիրներն են՝

- վերլուծել Իսահակյանի բանաստեղծության ուսուցման ազդեցությունը սովորողների՝ գրական երկի ընկալման և վերլուծման կարողության վրա,
- ուսումնասիրել բանաստեղծության ավելի համապարփակ ըմբռնման հարցում միջառարկայական կապերի ներուժը,
- առաջարկել բանաստեղծության ուսուցանման համար մանկավարժական մեթոդներ և գործողությունների հաջորդականություն՝ հենվելով տարբեր դասարաններում նման եղանակով ուսուցման մեր փորձառության և սովորողներից ստացված պատասխանների և բանաստեղծության մեկնաբանությունների վրա:

Սույն հետազոտության **օբյեկտը** Ավետիք Իսահակյանի «Մի մրահոն աղջիկ տեսա» բանաստեղծության ուսուցումն է՝ 8-րդ դասարանի աշակերտներին:

Հետազոտության **առարկան** կրթական տարբեր մեթոդները, հնքարները և վարժություններն են, որոնք օգտագործվում են բանաստեղծության առանձնահատկություններն արդյունավետորեն փոխանցելու և բովանդակալից քննարկումներ խթանելու համար:

Հետազոտությունն իրականացվել է դասարանային դիտումների և տվյալների վերլուծության **մեթոդների** միջոցով:

## 1. Ընդհանուր տեղեկություններ՝ բանաստեղծության մասին

«Մի մրահոն աղջիկ տեսա»-ն քնարական բանաստեղծություն է, որի մեջ կենսափորձով հարուստ մարդը և սիրո անմիջական առարկան՝ մրահոն աղջիկը, պատահաբար հանդիպում են Ռիալտոյի կամուրջին: Աղջիկը գեղեցկուհի է, և նրա աչքերից, ամբողջ շարժուձևից սեր է հորդում: Նրանց հայացքները հանդիպում են, և բանաստեղծի հոգին փոթորկվում է՝ հիշելով իր պատանեկությունը, երբ նման մի գեղեցկուհի կոտրել էր իր պատանի սիրտը: Այստեղ բանաստեղծի անհատականությունն ավելի ակնհայտ է, որովհետև տողերի մեջ առկա են Իսահակյանի անձնական կյանքի մանրամասները. հայտնի է, որ պատանեկության տարիներին նա սիրահարված է եղել Շուշանիկ անունով մի աղջկա, որին, սակայն, չի հասել: Եվ դրա համար էլ ասում է. «Մի մրահոն կույս էր քեզ պես./ Կոտրեց սիրտս պատանի...»:

Բանաստեղծության հերոսներն են մի անանուն մրահոն գեղեցկուհի, որը խորհրդանշում է կանացի դյութանքը, և հեղինակը, որն արդեն կյանքի փորձով հարստացած հասուն այր էր: Աղջկա գեղեցկությունը ներկայացված է արտակարգ գրավչությամբ: Իսահակյանն ասես նկարում է այդ աղջկան: Մի՞թե լինում են սև արևներ: Այս դեպքում, այո՛, լինում են, որովհետև աչքերի սև փայլը բանաստեղծը համեմատում է արևի անշեջ բոցի հետ: Կան այսպիսի արտահայտություններ՝ կրակ աչքեր, կրակված հայացք, աչքերի բոց: Ահա այս վառվռուն սև աչքերի կրակն է, որ աղջկա աչքերը դարձնում է «սև արևներ»:

Բանաստեղծությունը Վարպետի սիրերգության լավագույն էջերից է, որի «Տառապանքս փորձ ունի» տողը թևավոր խոսք է դարձել: Պատկերավոր նկարագրությամբ ընթերցողը տեսնում է ոչ միայն գնչուհու նմանվող գեղուհու հագուկապը, գալարուն շարժուձևը, աչքի բոցը, այլև պոետի տառապալից, խուսափող հայացքը:

**2. «Մի մրահոն աղջիկ տեսա» բանաստեղծության ուսուցման քայլաշար  
Դասի խնդիրները`**

1. լուռ և բարձրաձայն արտահայտիչ ընթերցանություն,
2. բնագրային աշխատանք,
3. ստեղծագործության հերոսների բնութագրում, բնավորությունների բացահայտում,
4. սովորողների անհատական և զույգերով աշխատանքի, ազատ և անկաշկանդ արտահայտվելու, դատողություններ անելու, միմյանց հետ հաղորդակցվելու, բարոյահոգեբանական մթնոլորտի ապահովում:

**Ուսումնական գործունեության տեսակները`**

1. անհատական,
2. զույգերով:

**Ուսումնական գործունեության ձևերը`**

1. լուռ և բարձրաձայն արտահայտիչ ընթերցանություն,
2. հարցերի ձևակերպմամբ փոխստուգում և փոխգնահատում,
3. հեղինակի, նրա ստեղծագործության մասին հանրագիտարանային, լրացուցիչ տեղեկությունների հավաքում և ներկայացում,
4. աշխատանք բնագրով,
5. գրառումնոր կատարելու և ներկայացնելու փորձ:

**Կիրառվող մեթոդները, հնարները, վարժությունները**

1. Մտագրոհ` մտքերի տարափ, ուղեղային գրոհ,
2. Ազատ և բաց հարցեր,
3. Համառոտ դասախոսություն,
4. Քառաբաժան,
5. Կենսագրական բանաստեղծություն:

**Միջառարկայական կապ`**

1. Աշխարհագրություն,
2. Պատմություն,
3. Հայոց լեզու,
4. Արվեստ:

**Դասի ընթացքը:** Նպատակահարմար է դասի ընթացքի նկարագրություն-սեղմագիրը կազմել` ըստ ուսումնական աշխատանքի քայլերի:

**Քայլ 1-ին.** Նախորդ դասի տեղեկություններ Ավ. Իսահակյանի կենսագրության մասին՝ յուրացման ստուգում, գնահատում, ամրապնդում: Ուսուցիչը դիմում է դասարանին, խնդրելով պատասխանել, թե ինչ էր հանձնարարված սովորելու համար: Հանձնարարություն-առաջադրանքների կատարման ստուգումը կազմակերպվում է հարց ու պատասխանի միջոցով: «Ի՞նչ գիտենք Իսահակյանի մասին» ընդհանուր հարցադրման ընթացքում աշակերտները միմյանց հարցեր են ուղղում, վերլուծում, քննարկում պատասխանները, անհրաժեշտության դեպքում լրացումներ կատարում: Խրախուսվում և գնահատվում են ոչ միայն ճիշտ, ամբողջական պատասխանները, այլև նպատակային, խելամիտ և ճիշտ ձևակերպված հարցերը:

Ուսուցիչն ուղղորդում է սովորողների մտքի ընթացքը, առանձին դեպքերում հարց ուղղում հարց տվող աշակերտին՝ խնդրելով մեկնաբանել հարցն ընտրելու նպատակը, նաև այն, թե ինչու է հարցը հենց այդ դասընկերոջն ուղղում:

**Քայլ 2-րդ:** Նոր նյութի ուսումնասիրություն՝ ԽԻԿ համակարգով:

***Խթանման փուլ***

Ուսուցիչը հայտնում է ուսումնական նոր նյութի վերնագիրը, ապա հրահանգավորում բացել դասագրքերը և երկու անգամ լուռ ընթերցել բանաստեղծությունը՝ ծանոթանալով նրա բովանդակությանը: Ընթերցանության ավարտից հետո նախընտրում է պատասխանել, թե աշակերտները ինչ կապ, առնչություն են տեսնում բանաստեղծի կենսագրության և ընթերցված բանաստեղծության միջև: Պատասխանները լսելուց, կարծիքներ փոխանակելուց հետո անցնում են դասի հաջորդ փուլին:

***Իմաստի ընկալման փուլ:*** Ուսուցիչը հրահանգավորում է համացանցից, հանրագիտարաններից և լրացուցիչ գրականությունից ընտրել նյութեր Իտալիայի և Վենետիկ քաղաքի մասին, զույգերով քննարկել, համակարգել և ըստ ցանկության, ներկայացնել դասարանին: Կատարված աշխատանքին հաջորդում է ուսուցչի խոսքը:

**Քայլ 3:** Համառոտ դասախոսություն: *Ղասախոսության սեղմագիր:* Մենք արդեն իմացանք, որ Իսահակյանն ստեղծագործել է գրական գրեթե բոլոր ժանրերով: Նրա ժառանգության բովանդակությունը նույնպես հարուստ է՝ բնություն, հայրենիք, սեր: Վարպետի սիրո քնարը երկու լար ունի: Լարերից մեկով հնչում է ժողովրդական ակունքներից սնվող գեղջկական պարզ, անմիջական, մաքուր, պատանեկան սիրո մեղեդին, մյուսով՝ եվրոպական երկրներում շրջագայած, ժամանակի փիլիսոփայական միտքն ու ոգին ուսումնասիրած, հզոր և ուժեղ կամք, գեղեցիկի և սիրո ընկալման նոր որակներ ունեցող կիրթ մտավորականի սիրո

համանվագը: Սրա արտահայտությունն, անշուշտ, «Մի մրահոն աղջիկ տեսա» բանաստեղծությունն է:

Մի մրահոն աղջիկ տեսա  
Ռիալտոյի կամուրջին,  
Հորդ մազերը - գետ գիշերվա,  
Եվ հակինթներ՝ ականջին:

Աչքերը սև – արևներ սև,  
Արևների պես անշեջ,  
Գալարում էր մեջքը թեթև  
Ծաղկանկար շալի մեջ:

Աչքս դիպավ աչքի բոցին,  
Ու գլուխըս կախեցի.  
Ժպտաց ժպտով առեղծվածի,  
Հավերժական կանացի:

Միամիտ չեմ՝ հավատամ քեզ.  
Տառապանքս փորձ ունի՛ւ  
Մի մրահոն կույս էր քեզ պես,  
Կոտրեց սիրտս պատանի...

**Քայլ 4:** Բանաստեղծության բարձրաձայն արտահայտիչ ընթերցանություն:

**Քայլ 5:** Հարցեր՝ ուղղված դասարանին:

Աշխատանքն անհատական է: Ոստուցչի առաջադրած հարցերը դրվում են աշխատանքային տետրերում: Դրանք կարող են ունենալ բովանդակային այսպիսի ուղղվածություն.

1. Ի՞նչ է պատկերում բանաստեղծությունը:
2. Ինչպիսի՞ն է կամուրջին կանգնած աղջիկը, ինչ արտաքին ունի:
3. Ինչպիսի՞ ներքին, հոգեկան աշխարհ կարող է ունենալ նա, ինչո՞ւ ես այդպես կարծում, փաստարկիր, կարծիքդ հիմնավորիր բնագրային մեջբերումներով:
4. Ի՞նչ կարող է խորհրդանշել ծաղկանկար շալը և այլն:



Հարցերին պատասխանելու համար սահմանվում է ժամանակ: Աշակերտները տեսրերում պատասխանների տեսքով գրառումներ են կատարում և ժամանակը լրանալուն պես ներկայացնում իրենց պատասխան - դիտարկումները:

**Քայլ 6:** Բնագրային աշխատանք. պատկերային համակարգի բացահայտում: Առանձնացվում են խոսքի պատկերավորման միջոցները`

- փոխաբերություն,
- փոխանունություն,
- մակդիր,
- անհասկանալի, անծանոթ բառեր ու արտահայտություններ:

Ուսուցչի օգնությամբ դրանք պարզաբանվում են և մեկնաբանվում: Այնուհետ ուսուցիչը գրատախտակին գրում է *սիրուն և գեղեցիկ* բառերը, ապա դիմում դասարանին` խնդրելով պատասխանել, թե բանաստեղծության հերոսուհուն բնութագրելու համար գրված բառերից որոնք են ավելի նպատակահարմար:

Կատարվում է բառերի ստուգաբանություն. պարզում են, որ *սիրուն* բառի անհնչյունափոխ արմատը *սեր*-ն է, իսկ *գեղեցիկ* բառի *գեղ* արմատը հնդեվրոպական մայր լեզվում նշանակել է կանչ, գեղգեղանք, գեղգեղել: Հետևում է, որ *գեղուհի, գեղանի, գեղեցիկ* նշանակում է նաև *կանչող, հմայող* և ավելի նպատակահարմար է առեղծվածային ժպիտով կույսի բնութագրման համար:

**Կշռադատման փուլ:**

**Քայլ 7:** «Բառաբաժան» գրավոր վարժություն:

Աշխատանքային տետրի էջի մակերեսը աշակերտները բաժանում են չորս մասի` այդ մասերից յուրաքանչյուրում մտքերը համապատասխանաբար գրառելու համար: Կատարվող վարժությունը կունենա այսպիսի ուրվապատկեր:

<p><b>1. Ինչ էի տեսնում բանաստեղծությունը կարդալիս</b> Ջգայություններ.</p> <ul style="list-style-type: none"> <li>• Տեսողական</li> <li>• Լսողական</li> <li>• Ջգացական</li> </ul>	<p><b>2. Ինչ էի զգում բանաստեղծությունը կարդալիս</b> Վերաբերունք.</p> <ul style="list-style-type: none"> <li>• Հույզեր</li> <li>• զգացմունքներ</li> </ul>
--	---

<p><b>3. Կապը իրական կյանքի հետ.</b></p> <ul style="list-style-type: none"> <li>• Զուգորդություններ</li> <li>• Առնչություններ</li> <li>• Օրինակներ</li> </ul>	<p><b>4. Նոր վերնագիր և պատկերանշան.</b></p> <ul style="list-style-type: none"> <li>• Ընդհանրացում</li> <li>• Վերափնաստավորում</li> <li>• գնահատում</li> </ul>
---	--

*Գծապատկեր 1-ին: Քառաբաժան*

**Քայլ 8:** Տնային հանձնարարություն: Հանձնարարվում է քնարական հերոսուհու համար ստեղծել կենսագրական բնաստեղծություն, որի համար սովորաբար ընդունված են հետևյալ բաղադրիչները՝

- անունը, բնավորությունը. նշել երեք հատկանիշ,
- սիրում է. նշել երեք անձ կամ առարկա,
- ի՞նչ է զգում. նշել երեք զգացողություն,
- ինչի՞ց է վախենում. նշել երեք պատճառ,
- ինչի՞ կարիք ունի. Նշել երեք ցանկություն,
- ուզում է տեսնել,
- բնակվում է,
- ազգանունը:

## ԵԶՐԱԿԱՑՈՒԹՅՈՒՆՆԵՐ

Ուսումնասիրելով 8-րդ դասարանում Ավետիք Իսահակյանի «Մի մրահոն աղջիկ տեսա» բանաստեղծության ուսուցման գործընթացը՝ հետազոտությունը վերահաստատում է նշյալ բանաստեղծության՝ ուսումնական ծրագրում ընդգրկելու կարևորությունը՝ ընդգծելով դրա արժեքը՝ որպես գրական ստեղծագործություն, որը սովորողներին ներգրավում է սիրո, գեղեցկության և ժամանակի ընթացքի թեմաների ուսումնասիրման մեջ:

Կարևորելով ուսուցման շարունակական կատարելագործումը՝ հետազոտությունն առաջարկում է նոր մեթոդներ և հնարներ՝ հարմարեցված 8-րդ դասարանի աշակերտների կարիքներին և նախասիրություններին: Խոսքը լուռ և արտահայտիչ ընթերցանության, ստեղծագործության ու կերպարների վերլուծությանը և սովորողների ստեղծագործական հմտությունների զարգացմանը միտված վարժությունների խելամիտ ընտրության մասին է, ինչը նպաստում է ինքնուրույն մտածողության ձևավորմանն ու ինքնարտահայտմանը:

Ավելին՝ **Աշխարհագրություն, Պատմություն, Հայոց լեզու և Արվեստ** առարկանի հետ միջառարկայական կապերի ստեղծմամբ առաջարկվում է բազմաչափ ուսուցման փորձ, որը հարստացնում է սովորողների՝ ստեղծագործության մշակութային և պատմական համատեքստի մասին պատկերացումները:

Ըստ էության աշխատանքն ընդգծում է դասավանդման մեթոդների շարունակական կատարելագործման և հարմարեցման կարևորությունը: Դրանով մանկավարժները կարող են հասնել նրան, որ հայ գրականության այս անգնահատելի կտորը շարունակի սիրվել 8-րդ դասարանի աշակերտների կողմից:

## ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

1. Գասպարյան Դ., Գրականություն: 8-րդ դասարանի դասագիրք, Երևան, 2012: